

摘藻堂四庫全書薈要

集部

欽定四庫全書薈要

集部

青山集卷一

二

詳校官助教_臣常循



欽定四庫全書薈要

青山集目錄

卷一

楚詞體

卷二

歌行

卷三

五言古詩



卷四

五言古詩

卷五

五言古詩

卷六

五言古詩

卷七

五言古詩

卷八

長句古詩

卷九

長句古詩

卷十

長句古詩

卷十一

長句古詩

卷十二

長句古詩

卷十三

長句古詩

卷十四

長句古詩

卷十五

長句古詩

卷十六

雜題古詩

卷十七

五言律詩

卷十八

五言律詩

卷十九

五言律詩

卷二十

五言律詩

卷二十一

七言律詩

卷二十二

七言律詩

卷二十三

七言律詩

卷二十四

七言律詩

卷二十五

五言絕句上

卷二十六

五言絕句下

卷二十七

七言絕句

卷二十八

七言絕句

卷二十九

七言絕句

卷三十

古律哀挽

附錄

臣等謹案青山集三十卷宋郭祥正撰祥正

字功父當塗人熙寧中舉進士以上書諛王

安石反為安石所鄙仕久不達嘗知端州復

棄去家當塗之青山以卒嘗以詩見賞於梅

堯臣晚又與賀鑄善故集中多襍仙佛之語

未免擇焉不精要其綺思俊句繹絡紛來逸

氣自不可掩宋史本傳稱其母夢李白而生

蓋後人因其詩格相近從而附會也王士禎

居易錄曰郭祥正青山集閩謝氏寫本六卷

古詩二卷近體詩四卷七言歌行僅二篇或有闕文是士禎所見屢經傳寫已殘缺不全今此本三千卷與文獻通考所載合猶屬完書蓋流傳僅存之本固可寶貴矣乾隆四十二年十月恭校上

總纂官

臣紀昀 陸錫熊 臣 孫士毅

總校官 臣 陸費墀

欽定四庫全書薈要卷一萬五千九十二

集部

青山集卷一

宋 郭祥正 撰

楚辭體

補到難

并序

真陽有山削立出江上陰翳其外軒豁其內名為碧落
洞天唐周夔羽皇題文命曰到難言其去中國之遠而
賢士大夫之所難到也詞則麗矣然未能盡碧落之狀

予取其言而補之題曰補到難篇云

到乎難哉碧落之洞天上有嵐壁之瑤局下有澄溪之
碧瀾碧瀾之下寸寸秋色目窺之而可量手拏之而莫
得竇容光而練飛巖漬陰而乳滴如長人如巨虵如翔
龍如鏤鄒如倒植之蓮如已剖之瓜如觸邪之獬豸如
蝕月之蝦蟇或斷而卧或起而立或欲鬪而搏或驚顧
而呀若斯石也吁可怪耶何詭絕之異觀嘗置之于幽
遐到乎難哉長蘿美秀瘦木竦直香櫻寒而自媚名槩

詢而鮮識烟霏霏而引素雲悠悠而奮翼亟模似其變
態已泯然而無迹崩漸遠響聲落瑟續聆之愈深詠之
不足欲幽棲而忘返尚徘徊而眷祿彼寧待乎世人蓋
有要于仙躅到乎難哉信夫到之難也匪到之難知樂
此以為難知樂此矣能久處之又為難余故補到難以
題篇此

巫山送吳延之出宰巫山

送子之邑兮山之裁裁繁物之可賦兮曰如之何虛徐

忱耀兮匪車匪馬匪足匪翼兮奮于巖阿薄萬象兮周
四海爛五采兮揚天波倏然悄然以自斂妥輕素兮縈
翠螺容與兮窈窕行止兮委蛇吐兮若英攢兮若葩聚
若白蟻散若楊花爰有靈依兮遂異于他對之自然又
不可求逐之無迹愴我離憂上下無窮變化周流亂曰
縣延天矯兮竟何補替天工兮濡厚土舒則有時兮卷
則有所不為神女兮而為君子

山中

風蕭蕭兮雲藹藹泉淙淙兮石皚皚禽驚人兮遠飛去
以復還客醉其間兮殊不知為冠帶髮被衣顏以自顧
兮誰為吾仇山花為我一笑兮山草為我以忘憂嗟世
人之愚兮竟營營以何求求百年之寵榮兮取萬世之
奴囚怵讒舌之甚兮尚毀孔而謗周咄何得而何失兮
孰為馬而為牛歌數作兮飲未休石駭以走兮泉凝而
不流起挽石以道泉兮爾何我尤吾將去乎世兮結爾
以長年之游

招遜

遜兮樂歟吾能為子言之山高水長兮遜歲月而忘歸
朝採木兮遜而食暮葺蓑兮遜而衣雲徜徉兮出岫奮
吾心兮與期日躅躅兮行天弔吾影兮沉西委吾形兮
自信豈世塗之詰曲兮能屈伸而驚馳遜其樂兮吾能
為子重言之林之深則鳥獸遜而樂水之深則魚龍遜
而樂帝者之道備則生民遜而樂遜將獨樂乎哉吾弗
與也于是作招遜之辭辭曰來

句來音離

馬肥馭良兮遲子

以歸虎豹齧人兮胡獨為宜朝有好爵兮廩有好祿
勿遯兮于斯之時

言歸

休歟歸乎何為而言哉予七齡而孤兮託慈育以苟生
捉手以筆兮口授以經緒先子之素訓兮夜未央而丁
寧既束髮以就學兮入必問其與游聞道之進兮曰使
我以忘憂課蠶而織兮紉衣以先汝使弗墜業兮我勞
而汝處慨薄德之眇末兮今逾壯而不揚吾母耄兮戀

故鄉雖得邑而祿兮曾寤寐之弗遑與音問之吉兮孰
若朝夕而在傍誰繫予足兮眷白雲之徜徉還印綬于
有司兮賢守足以往訴將俟代而返兮念歲月之云暮
休歟歸乎春山施施春水瀾瀾春蒲濯濯春魚尾尾吾
親在前吾子在後飲甘滌潔以介眉壽

廣言歸

予將歸兮而有言德渺薄兮言弗見信

音仲

孝乎為孝兮

友于弟弔奚為為政兮予之所存慨日月兮往而不返

吾親八十兮事之云晚朝廷清明兮予忠曷施道弗行
于家兮何以教吾民之為哉嗚呼耕吾土兮足以食條
吾桑兮足以衣予奉親兮孰不可樂予治身兮尤以為
宜蹇何憂兮何思恬無悶兮無知休歟歸乎以退為進
兮予發諸誠乎賢誰弗信乎

泛江

歲在庚子月惟孟冬蹇予職事鼓楫長江感慨其懷而
為之辭云士有以處兮無畝以耕眷餘緒之尚抽兮慨

慈親以遲榮虛徐縮瑟以內習兮予實愧乎先民之心
惚恍惻愴其不得已兮被命于九江之潯戴皇天之休
兮廩足以飽度白日之難兮誰察予情汹汹兮北風怒
浪兮滔天撫慈膝兮出門淚漣漣兮就船事將有責兮
死豈予之所畏蓋忠未足以盡報兮孝未克以自信惟
行止之坎坎兮適簡罪以異生度白日之難兮誰察予
情蛟嚙齒兮岸摧蜃矯首兮渡分妖鱗怪鬣曾莫識其
名兮怒銜牙以相矚數將傾而還復兮予委命乎上靈

幸生全而就泊兮夜風止而月吐曠上下之澄澈兮適
縱觀乎琉璃之府北斗揚光兮百怪潛伏岸芷露翠兮
汀蘭放芬起予思之無窮兮既跼影以自慰又苦辭以
招魂辭曰始凶終吉魂兮歸來奚往而失

殤愁

氣氤氲兮隘如魂颺颺兮寧居慧言在耳兮疇能捨諸
異質沉壤兮委夫頑虛鴻雁零飛兮若獨何趨蘭茝早
悴兮天孰與辜雄嘒雌啼兮巢失佳雛天地黯黯兮風

雨呼呼旖翩翩兮導衛夜冥冥兮永殊樽有醕兮鼎有魚享弗享兮日月云徂

醉翁操

泠泠潺潺寒泉瀉雲間如彈醉翁洗心逃區寰自期猿鶴俱閒情未闌日暮向深源異芳誰與搴忘還

泛聲同

瓊

樓玉闕歸去何年遺風餘思猶有猿吟鶴怨花落溪邊蕭然鷺語林中清園空山春又殘客懷文章仙度曲響涓涓泛商回徵星斗寒

古思歸引

石季倫有其序而亡其詞

昔人思歸兮宅林藪之邃深阻長隄而臨清渠兮芬翳
翳以交陰有觀閣池沼兮通泉溜而附嶽壑寒美羽之
翔集兮嘉魚樂而浮沉時則命宴于芳晨兮連親戚與
佳賓執樂而侍兮列秦趙之艷人管絃奏兮歌悠揚而
絕塵粲蘭桂兮羞有珍左琴右書兮助為娛而養真又
期于不朽兮志傲然而凌雲孰與婆娑于九列兮頽牽
羈于繁文曲有絃而無辭兮述予懷以自信中歌曰日

金方口人卷一
本一
轂馳兮老將至鑠外紛兮中系累歸去來兮予之思放
吾形兮聊逍遙以卒歲

補易水歌

燕雲悲兮易水愁壯士行兮專報仇車鱗鱗兮馬蕭蕭
客送發兮酌蘭椒擊筑兮喑咽歌變徵兮思以絕易水
愁兮燕雲悲四座傷兮皆素衣歌復羽兮慷慨髮上指
兮淚交揮又前為歌曰風蕭蕭兮易水寒壯士一去兮
不復還

思嵩送劉推官赴幕府

我思嵩兮三十六峯之葱蒼雲霞卷舒兮紛五色而爛
朝陽渺羣仙之不可見兮時有鸞鶴雙翔翔窮崖斷壑
兮飛泉吼怒森琳琅儼修松與美竹兮碧離離而低昂
考周室之卜世兮顧八表為中央天乃寵于吾宋兮六
陵相差而永藏惟傳祚之億萬兮豈八百以為之長引
伊洛之二水兮聿通汴而注揚回黃流于故道兮滅湍
射而汪洋橫星橋于河漢兮紫闕峙而煒煌列槐植之

行杭秀兮歷五代而經唐承太平之雨露兮幸不遭乎

伐戕為衆木之耆艾兮如羽蓋之迭張慨離彼而適此

兮亦出處之靡常既寓情于物表兮獨思嵩之未忘忽

有客兮鼓枻言別我兮靈羊將度庾嶺沿濤江涉淮沂

汴入幕乎洛陽詞氣有餘頓挫鏗鏘誠南士之穎出然

未始離乎炎荒請陟嵩而遠覽循今古而徜徉矯垂天

之翼粲瓊瑤之章于是被詔音登玉堂返眎乎羅浮朱

明如棄魚目而懷夜光也

王逢原哀詞

追髣髴兮故國之高丘與子之相遇兮聽其言而若秋
雍雍而肆兮嚴嚴而收樂我之心兮以遨以游予將娶
兮于南州莫克從子兮翻自省以幽幽川陸兮沉浮日
月兮再周云子之長逝兮愴我之深憂予不可見兮道
將誰求彼蒼者天兮胡慘胡仇奪子之速兮使不位予
公侯雖窮德之特立兮弗與世以綢繆嗟坎水之未盈
兮竟何澤以休休瘖予之聲兮血予之眸猶不足以止

兮靈何在而薦羞惟永絕兮奈何悵平昔兮悠悠

徐孺興哀詞

嗟乎孺興之不幸兮上有高堂白髮之慈親孝不克以

自信

平聲

兮魂將逝而復返目冥冥而莫勝兮顧天命之

予

上聲

短業脩脩兮志與道配寂不少振兮遽沉幽而終

蹇蘭未芳兮先凋月將昇兮俄隕孺人囂囂兮追話言

之弗足夢悠悠兮魂去來而數

入聲

感撫稚子兮秋夜長

暗明璫兮摧腕玉魂何知兮興予之哀體與道化兮歲

月徂而屢周情纏綿兮若俱往則已矣詞不足以盡寄
兮託餘思于江流

留君儀哀詞

并序

南漳留定君儀才行之士也嘗有德于予今其卒矣故
為之詞以哀之

懷伊人兮漳水之湄爰結好之初兮予方出乎陷穽之
羈縻彼知予之橫罹兮眷乳乳而弗支氛侵侵而襲人
兮子獨贈我以蘭芝芳芬芬而爽吾衷兮雖厄窮而弗

疑言涓涓而洗吾耳兮寂塵聽而淒其炊嘉黍而納吾
腹兮使朝則忘飢采薜荔為予之服兮慨前修之可追
脂吾車而秣吾駒兮造仙窟之幽竒煮甘溜而茗酌兮
珍盤進乎離支唱則和兮迭指摘其醇醑同底于道兮
遵聖渚為之歸聊容與以卒歲兮曾弗察乎白駒之騫
馳泊中吉而啟行兮觴桂漿以遠離惕南北之緬邈兮
蹇形影之頽衰歌激揚而再發兮淚浪浪以沾衣馬悲
鳴而仰顧僕弛負以增欷行雲駐而黯慘去鳥返而低

迷歲聘介而一至兮孰敢為之後期幸再往而再復兮
釋予心之思也忽承訃以躑躅兮行不知其所之也嗟
若人之蘊美兮天其奪之速也塞松柏之枯折兮惡植
則滋以榮也考太空之役物兮必善搏而化之也將為
麟為鳳兮對明世而出也將為蘭為蓀兮芬馨香而薦
上帝也將為江為河以濟舟也將為雨為露而澤物也
將復為人兮英華于士林也將為仙為神兮自適于逍
遙之境也嗚呼以甚塞之懷兮測乎無涯之朕以有限

之情兮導乎無窮之悲嗚呼其有知乎其無知乎吾其能久乎吾將從子于重泉之游乎吾又何詞之哀乎

山中樂

并序

歐陽公有山中樂三章送惠勤師歸杭後四十年勤師之孫元竦上人頗好吟詠從子游且言思歸舊栖因擬山中樂一章以勸其歸其詞有同有不同亦各言其志也必有讀者能得之

歸乎樂哉山中之樂兮其樂無窮藹蔥蒼而杳嶺叢兮

峯青瑤之諸峯琉璃一碧兮湖波止而溶溶層樓相望
曲徑相通魚龍轉影于汀瀾之際鐘梵答響于烟雲之
中鳥嚶日暖兮花氣濛濛寒密葉而成幄兮風颯颯而
吹松巖谷玲瓏霜木落也玉宇浮空冰漸凝也天高月
朗兮定省乎華嚴之境雷奔雨驟兮作新乎水墨之宮
達僧擬王孫之葬師逸士林躡淵明之蹤方爾祖之
得名兮考其言于廬陵之醉翁曰嗟世之人兮曷不歸
來乎山中山中之樂不可見今予其往兮誰逢後四十

年爾復好吟遠游不反求我之從勸爾之歸兮栖老乎
山中爾之材兮甚良當自適其無庸之庸違世絕俗黜
明塞聰山中之樂兮乃可以久非我與爾兮誰同

石室游

端城之北徑五六里有石室兮洞開其上則七山建斗
司天之喉舌其下則淵泉不流渟碧一杯窺之則肌髮
冰去聲酌之則煩心灰四傍則石乳玲瓏中敞圓蓋窈窕

萬丈莫窮其厓孰納忠兮嗟肺肝之已露孰止戈兮束

兵仗而相挨儼衛士之行列肅庭臣之序排紛披披兮
蒂萼粲縱縱兮條枚安而不可動者為梁為棟奔而不
可止者為虎為豹龜闕首兮屏息蚪奮鱗兮搏雷怪怪
竒竒兮千變萬態愈眎愈久兮惚恍而驚猜何人境之
俯近而仙宇之秘異如此者哉蘿卷風兮窈窕春漬芳
兮不迴或命佳客或寓幽懷考二李之勁筆邕皆一時
之遺材援玉琴以寫詠悵夕陽之易頽方謝事以言返
眷茲室而徘徊雲惝容兮泱泱鳥送音兮悲哀況百年

之將盡邈夫萬里奚復來

逍遙園

并序

筠州之城西有園名曰逍遙因山而得名今鄒君幾聖大夫之所有也予作逍遙園一首以贈幾聖云

逍遙有水一溪有竹三畝蘭芬菊芳松老石瘦堂居其中亭列左右菲菲兮春榮陰陰兮夏茂孤猿嘯兮秋夜長空桑曄兮冬雪晝山之名兮人莫知公為主兮天所授其或要佳賓酌醇酎清吟得韻兮非人世之絲篴屬

筆成篇兮發天機之錦繡方且登高臺挹遠岫俯仰羣
仙咨詢遐壽脫輪蹄之縈服煙霞之秀于斯時也一舉
九萬兮吾不知其為用嗒焉自喪兮吾不知其為偶脩
兮宵兮非無之無寂兮息兮非有之有無何亦何得而
名有寂則寂遽能久至若聽出于垣觀入于牖此鄙士
之常習又安得與夫逍遙主人而為之友也哉

孤雲寄潘延之先生

望孤雲兮山之巔
淅淅雨兮何油然
送孤鴻兮海之涘

高舉翼兮游無邊彼君子之如似兮脫世俗以不返奚
無悶而止兮又放意以窮年川有航兮陸有馬園有佳
木兮池有芳蓮坐卧兮白日笑歌兮朱絃客至止兮樂
我之樂豈公侯之下兮曾弗擇乎愚賢僕夫以耕兮妾
女以織恬弗愧兮我衣我食神仙之逍遙兮固不得以
見之君子之宴息兮舉斯世以誰敵嗟世人之自徇兮
莫知其求勢得而傲兮勢失而囚靡後先之思兮孰進
退之由苟歲月之徙兮託冠帶以包羞惟吾子之賢兮

貧未足以自周匪妻子之累兮實吾親之憂慨負重兮
執熱慕袒跣兮臨流

采薇山之巔贈張無夢先生

先生曰采薇山之巔兮吾非求之為仙吾無一畝之宅
一丘之田飢食山之薇渴飲山之泉巖為吾居兮鹿為
吾馬吾豈不足兮翱翔乎山之間彼世俗之混混兮嗟
苦短之白日此一身之悠悠兮聊自樂以窮年彼塵埃
之荏苒兮此雲煙之綿聯誰謂才之大兮慨匠氏之弗

取吾獨幸其弗取兮森葱蒼而自全粵吾君之為治兮
三王之聖而吾相之為輔兮伊周之賢吾父吾母兮皆
善終以天算進何憂而退何憾兮養吾氣之浩然弟子
進而贊曰采薇山之巔兮其樂也如此衣曳曳而情飄
飄兮願執轡而往焉

青山集卷一

欽定四庫全書薈要卷一萬五千九十三

集部

青山集卷二

宋 郭祥正 撰

謠行

姑蘇行

送胡唐臣入幕又
送朱伯原秘校

登姑蘇望五湖范蠡扁舟竟何在吳王宮殿惟荒墟使
君誰何好平恕寬則脂韋猛則虎只今卧治聞黃公更
得高才歸幕府願令里巷謠召南風化流行成樂土昔

年引對大明殿國論軒軒動人主往持使節臨朔方威
霽秋霜愛春雨玉上青蠅誰強指鼻端有望寧傷斧升
沉偶爾非吾嗟不用東方且為鼠豈聞絕代無佳人何
必西施妙歌舞盛傾綠酒鱸肥鱸承詔還從大梁去

泠泠浣溪水悠悠天柱雲雲行水光動水洗雲影分幽
人坐卧吟孤絕迥出羣資彼雲水秀釋此塵垢紛胡為
倏言別扁舟連夜發往登姑蘇臺而望太湖月却尋史
遷迹但見蒼煙滅覽古竟論今治具校工拙有才不得

施著書貽後世何必腰黃金自享千載貴鱸魚秋正熟
雲泉味尤美若逢吳市門更訪長生理

送姚彥經訶行

春風動地吹春去行人不肯江邊住片帆朝掛暮千里
烟霞蒼茫宿何處聞君少年日射策明光宮同時得意
三百輩上林曾醉桃花紅十餘年間事超忽幾在青雲
幾白屋君雖未甚榮亦足有餘樂存心不負聖與賢何
須畫影凌烟閣潯陽城頭古樓壯邂逅相逢觀溟漲魚

龍奔走勢莫分却憶當時兵火愁殺人至今戰場無綠
草冤魂夜哭寒蟾老臨風瀝酒一弔之而我浮生何足
道聊為君行謔數聲青山截斷江流平晴雲相對似能
舞野鳥好語如吹笙却把閑愁付滄海身雖離異交無
改若訪蓬萊王母家為攀琪樹遙相待

桃源行寄張兵部

武陵溪上青春暮昔人傳有桃源路時見落花隨水流
咫尺神仙杳難遇神仙有無何可量但愛武陵山水強

松烟竹霧水村暗鳥啼猿嘯花雨香車輪不來塵空絕
日月自與乾坤長聞君取身欲長往禾熟良田給春釀
陶然一醉萬事休還我天真了無象生胡為榮死奚感
為笑紛紛避秦客一身千歲何足論更向漁家寄消息

闕

冥神交兩相許倒提金斗傾濁醪滴瀝招魂寂無語斜
陽銜山暝潮退兩兩漁舟迷向背便欲因之垂釣竿六
鼇一擲天門外

九華山行

羣山秀色堆寒空九華一簇青芙蓉誰云九子化為石
聚頭論道扶天公深巖自積太古雪燭龍縮爪羞無功
湍流萬丈射碧落此源真與銀河通塵埃一點入不得
煙霧五色朝陽烘有時昏昏雷電怒崩崖裂壁揮長松
龍作雨虎嘯風白日變明晦九子亦慘容褐冠釋氏胡
為笑傲于其中我將學彼術卷舌奮志求童蒙天公信
玉女號令不爾從嗟爾九子竟何補非泰非華非衡嵩

廬山三峽石橋行

銀河源源天上流，新秋織女望牽牛。
洪波欲渡渡不得，此鵲為橋誠拙謀。
胡不見廬山三峽水，此源亦接明河底。
擘崖裂嶂何其雄，崩雷泄雲勢披靡。
飛鳥難過虎豹愁，四時白雪吹不收。
燭龍此地無行迹，六月游子披貂裘。
誰將巨斧鑿大石，突兀長橋跨蒼壁。
行車走馬安如山，下視龍門任淙激。
寄言牛女勿相疑，地下神工尤更奇。
喚取河邊作橋棟，一年不必一佳期。

谷簾水行

嶄嶄青壑仙人居水精簾掛光浮浮

扶音

中有天樂振天

響真珠琤淙碎珊瑚嫦娥擁月夜相照天光地瑩倒玉
壺又云玉皇醉玉液瓊簾千尺從空鋪卧來北斗闌以
起驚風吹落青山隅溶溶萬古萬萬古竟誰能辨為真虛
我來吟哦不知晚山雲四暗山魑呼安得長鯨駕天險
下眎靈源知有無

鸚鵡洲行

猛虎磨牙齒九州彌生何事來掀掀黃雲屯屯宴賓客
故衣脫去更岑牟渙陽慘澹曲聲苦壯士銜悲寂無語
漢朝社稷四百年海瀉濤淙一盃土嗟哉鼓史狂而癡
天運往矣安能追四方血戰殊未已三尺柶杖真何為
君不見武昌之國鸚鵡洲至今芳草含春愁可行則行
止則止死無所益令人羞死無所益令人羞黃祖曹公
均一丘

金山行

金山杳在滄溟中雪崖冰柱浮仙宮乾坤扶持自今古
日月髣髴躔西東我泛靈槎出塵世搜索異境窺神功
一朝登臨重歎息四時想像何其雄捲簾夜閣挂北斗
大鯨駕浪吹長空舟摧岸斷豈足數往往霹靂撻蛟龍
寒蟾八月蕩瑤海秋光上下磨青銅鳥飛不盡暮天碧
漁歌忽斷蘆花風蓬萊久聞未成往壯觀絕致遙應同
潮生潮落夜還曉物與數會誰能窮百年形影浪自苦
便欲此地安微躬白雲南來入我望又起歸興隨征鴻

潛山行

笑別姑孰州來作潛山游潛山聞名三十載寫望可以
銷吾憂晴雲如綿掛寒木廣溪鏡靜涵明秋山頭石齒
夜璨璨疑是太古之雪吹不收信哉帝祖駐鑾蹕異景
怪變誰能求若非青崖見白鹿安得此地排珠樓羣仙
長哦空洞絕綠章封事乘虛輶靈鳥盤旋老鶴舞華燈
散采祥飈浮噫吁噓漢武登壇求不得明皇夜夢推五
百寧知司命抱真符為宋真人開社稷詔書數下修琳

金方田人卷二
宮殿閣縹緲平諸峯六朝德澤施愈遠九天福祐來無窮君不見潛山之下潛水之涯菖蒲有九節白朮多紫花採之百拜獻君壽陛下盛德如重華

山中吟

山中吟白日長碧霄泉暖菖蒲香仙翁勸我採為食登高遂覺足力强登高望遠遠思發春風浩浩天茫茫美人一別隔滄海青鳥寄與雙明璫青鳥東飛亦不返草色綠縹雲徜徉草色幾回綠雲飛無故鄉魂迷夢斷意

何在山中吟白日長

山中樂

尋山佳興發一夜渡江月首到廬江元放家水洞清光
數毫髮愛之便欲久棲息又聞靈仙之境敞金闕清風
吹我衣不覺過皖溪危梁千步玉虹卧松行十里青龍
歸煙霞繞脚變明晦忽見殿閣鋪琉璃重簷却在迥漢
上倚欄俯眎白日低虛庭自作簫籟響屋角更無飛鳥
飛霓幡重重蔽真御髣髴遙見星文垂長廊紗籠絕筆

畫老龜穩載青瑤碑更逢逍遙不死客齒清髮翠桃花
肌蕭臺可到亦非遠雲間况有白鹿騎細窺絕景輒大
笑吾曹何事塵中為安得良田三百畝可以飽我妻與
兒長年只在名山裏萬事紛紛都不知

將歸行

男兒四十無所成可憐鬚髮霜華生尺書朝奏夕命相
此事故非言不行低徊却入邵陵幕梅嶺招降建城郭
論功第一遭衆讒斷木浮沉委溝壑噫吁噉數竒不獨

李將軍株坐桐鄉三見春
桐鄉雖好大兒死風物滿眼
唯悲辛邇來又赴肥上辟
碌碌隨人亦何益法網深懸
無縱鱗斂翼飢禽憂彈射噫
吁噫一寸丹心不堪折扁
舟却憶姑溪月溪如凝冰月
如雪天地清光迥交澈釣
絲千丈入琉璃六鼇一舉三
山隨人生快意莫如此腰
束黃金多橫死君不見日暮
途窮逆行客一餉榮華速
誅殛又不見都市朝衣就劍
人誰道忠言能殺身休休
休歸去來芝田石室雲長在
瑤草琪花春不回收帆銀

濤即平陸跨青牛兮驅白鹿莫向人間岐路行豈有悲
歡與榮辱休休歸去來計已決肯學腐儒空有言辜
負春鵲口流血

東林行

龍蟠大地藏山腹瑞氣蒙籠紫金屋香爐萬丈擎碧霄
二澗斜飛落寒玉晉朝遺事唐人辭皴皸龜螭尚堪讀
樓煩真人應夢來夜斧丁丁神伐木安帝親留步輦迎
靈運開池素華馥會隨流轉不成塵燈焰明明自相續

游人未達此理玄安得清涼滅貪欲我今棄官脫塵網
僧寶瞻依無不足跨黃牛騎白鹿時時自唱無生曲無
生曲君試聽五音六律和不得為君寫作東林行

圓通行簡慎禪師

廬山之西形勝聚無位真人依位住地祇掣鑠金城開
石龍噴水銀潢注峯巒約勒萬馬回杉松自作千兵護
寶殿崢嶸跨碧霄圓容麗服微西顧江南妃子親施田
香飯供僧無億數法焰相傳十二人師泛鐵船楊子渡

楊子渡秋風高霹靂駕雪翻驚濤中有漁家妙絕手一
釣三山連六鰲縱時大地悉震恐收來塵刹無纖毫當
年曾許心莫逆今朝又作圓通客挂冠已脫塵垢緣一
心願住清涼國清涼之國誰能知日長馬倦人多迷從
來聞說曹溪路只今蹋斷廬山西

韶石行

扁舟未下連虞灘韶石羅列誰雕刻化工有意露怪變
待彼虞舜來觀翫泊舟登岸始遠覽兩峯直裂諸峯巔

青鸞低徊欲下飲翠鳳却舞搏脩翰鰐龍櫻雷怒奮角
帝子出震初莪冠日光撲撲散金蘂蓮花透澈琉璃盤
行衣十里仙霧濕暝色一抹輕綃寒我臨仙崖想韶樂
北風忽變陰漫漫松搖長空吼萬壑溪走石脚淙驚湍
遺音自與天地響聽不以耳精神完重瞳一去無復還
隨風波兮陟雲間瀟湘洞庭亦何有竹上血淚千年斑
九成不作至道息紛紛後世疇能攀登韶石兮情飄飄
而未盡飭彼柴車兮且將造乎蒼梧九疑之深山

姑孰堂歌贈朱太守

姑孰太守真賢豪洗滌弊垢明官曹民間吏竦郡無事
華堂新構臨江皋朱簷斜飛傍星漢碧瓦不動蟠鯨鼇
釀成玉液宴賓從手提大筆降風騷四時景物換耳目
萬古治亂評秋毫嗟予末坐重感激胃中茅塞時耘薅
山雞卑栖竟何取豈合鸞鳳反翔翺紫萼茸蕨味正美
鮮鱗玉縷鳴霜刀為公一飲直醉倒坐看萬室皆陶陶
誰云江南地偏小姑孰之堂天下少丹湖千里浸城東

蒲葦藏煙春渺渺牛渚對峙凌歊臺長江倒掛天門開
風吹玉馬億萬足漢兵卷甲沙場迴有時浪止皓月滿
琉璃宇宙無纖埃帆檣隱隱鳥飛沒漁歌細下天邊來
謝元暉李太白一生好作江南客至今遺恨人不知孤
雲尚鎖青山宅請公漑酒一弔之聽我長吟壯靈魄人
世百年能幾何高會難逢離別多一朝公去調鼎鼐斯
堂永作甘棠歌

宣詔廳歌贈朱太守

使君心畫天下無構廳宣詔西南隅曉光初散射簷桷
夜氣欲合吞江湖覽甃摩挲滑瑤玉重窓窈窕明青朱
胡生畫手出前輩素壁為寫巫山圖一條江練澄碧落
十二峯色裁珊瑚元猿老虎嘯髣髴長松瘦石寒扶疎
中間皓鶴最恬淡九霄獨立形神孤君去班春勸耕稼
君歸命客同歡娛三冬垂簾醉春瓮六月靜坐臨冰壺
巴戕血色洒醉筆五字七字排璣珠和風匝地怨氣滅
險吏縮手窮岷蘇地隨人盛古今好姑孰自此為名區

君不見滕王閣庾公樓樽罍千載誇風流又不見燕寢
一詩尚不減至今人道韋蘇州噫吁噫四座勿歌聽我
歌宣詔之名君謂何守臣不壅帝王澤六合長靜無干
戈

濟源草堂歌贈傅欽之學士

秀氣鴻濛濟州曲十畝清池萬竿竹竹裏修椽架草堂
不羨長安買華屋春生廣野碧玉柔月擁翠嵐銀粉撲
低飛白鷺揀晴沙聞曉黃鸝轉喬木明明長劍倚太行

拂拂愁煙蔽盤谷重岡漸遠勢愈高雲開青出分秋毫
龍蛇鱗甲雪霜洗壯士四顧空提刀陰晴萬變恣吟寫
三疊琴聲猿夜嘯君不見古來功名輸隱叟種桃採芝
皆皓首不將機械攪靈源能使形骸頗長久明公何年
歸草堂扁舟我即浮滄浪江魚有味四時美一蓑醉臨
蘆花傍男兒彼此送終畢自算此身無得失江東片月
過河陽為照兩處無何鄉

寄題蘄州涵輝閣呈太守章子平集賢

讀君涵輝記恍若登蓬萊天垂星斗數尋近地卷雲山
千里來冰壺倒景露華洗玉竇溶雪蟾光顏塵寰何處
路岐絕三十六洞森然開武夷真孫佩符印選勝得此
將金壘文章欲會造化手藩屏暫屈巖廊材謝公寄意
東山妓嚴生把釣桐廬臺功名談笑出千古長與泰華
青崔嵬其餘齷齪何足數百年易得成寒灰為君高吟
豈知倦十分美酒誰相陪我欲乘風一飛往病翅零落
秋霜摧涵輝閣寧久游重瞳法堯垂冕旒側聞下詔十

六相真孫第一還瀛洲

宣州雙溪閣夜宴呈太守余光祿

陵陽三峯壓千里百尺危樓勢相倚海波不動蛟龍盤
疊玉無塵雪霜洗溪光冷浥山光潤地接金陵古名郡
青猿嘯斷四五聲白鳥歸飛兩三陣四時之景皆可觀
六月來游膚髮寒有時下瞰北山雨只道林林銀竹竿
賢哉光祿余太守昨引佳賓列樽酒朝飲三百杯暮吟
三百首不為陰慘嚴刑誅長吐陽春活殘朽御史曾書

治績碑州人盡祝靈椿壽沉沉羅幕更漏稀燈如撒星
公醉歸絲管前引後鼓輦珠履交錯行遲遲丈夫得意
不為樂借問百年能幾時

寄題洪州潘延之家園清逸樓

南昌城中潘令宅清逸樓高二千尺斜飛四角河漢躔
密排萬瓦鴛鴦碧樓中至樂無人知掃盡寰區利名迹
霜華吹月雁橫空湖水浸天秋一色榜聲斷漁歌起西
山却在蘆花裏行客紛紛嗟白頭纓塵不解滄浪洗愛

君年少先拂衣古人歸去無今時上有明明垂衣之堯
舜下有錯落戴主之咎夔湟中不用一簫取繚繞驛道
通犍為更看牧馬天山草澡心雪恥幽燕兒朝廷大業
昔未有志士獨往吾何譏陶彭澤阮步兵回首晉道方
飄零絲桐欲彈悲思盈豈如潘令逢昇平倚欄一醉絃
索鳴紅綃燃蜜爛華星玉人舞徹東方明

寄題德興余氏聚遠亭

暗空風卷浮雲落萬里秋毫瑩寥廓姮娥泛月中夜來

撲撲山川銀粉薄天垂斗柄掛簾鉤地接明河浸欄角
誰傾世界入冰壺滉滉仙春迷海嶽嗟予南望未能往
小宰塵勞真甌甌感君寄我羣公篇覽記方驚予先作
詞源奔激吼波濤筆畫縱橫挫矛槩構名措意豈徒然
景物化為仁智學丈人教子惇義方宴息時來命樽酌
何當勇起擎扁舟夢寐思陪衆賓樂

留題潛山山谷寺

山如連環不可解玉溜穿崖鯨尾擺中天化出清涼宮

汗漫琉璃翠光洒回頭無路通人間毛髮森森神魄駭
長碑突兀壓巨鰲字刻雄文入模楷乃知梁僧挈刀尺
來此幽棲聊脫械地祇掣鑠巖戶開縱有堆金豈能買
粲祖傳衣當第三至今異骨藏斯巖我朝重賜七寶塔
舍利感應符至誠誰曾磨崖記名姓習之健筆深鐫鐫
盤鼉皴鱗想風緊雲霧慘淡遮松杉至寶不獨世所惜
定有山鬼長局監願借雷公霹靂斧堅珉斫斷載以函
高僧邀我恐忘返虎豹堪驚日將晚歸來拂榻坐虛堂

軟煮黃菁薦香飯千年遺迹安足誇幻妄非真生有涯
奈何吾勢未能已夢想長在金仙家

留題九江劉秀才西亭

西臨大江南瞰
廬阜北見四祖

南出九江城西下五老岡倏然一徑二三里流水散漫
桃花香桃花迴環蔽深屋犬吠游人人扣竹青衣借問
來何為正是劉郎春酒熟劉郎不厭客撫掌邀我曹西
亭有榻醉可卧下臨大江萬頃之洪濤長帆出沒送孤
鳥月飛不過哀猿嗥更愛雙劍峯正落南窓外天公好

仁不用武太古光鋌未磨淬誰懷邪佞心見之膽應碎
淮山在天末寒青亦相對微風時一來松柏搖蒼珮頃
刻神官驅黑龍汹汹興雲變明晦地勢雖高直可驚酒
行且止爲休暇劉郎顧我笑爲言向苦悲陰晴非汝職
不醉將疇歸歸來手頻相過西亭把酒共君歌

留題西林寺攬秀亭

李公擇學士命名云李白有九江秀色可攬結吾將

此地巢雲
松之句

行瞻香爐峯未出二林口一區廣地如席平誰作新亭

名攬秀秀色可攬結正對香爐峯李白愛之不忍去便
欲此地巢雲松寂寥往事三百載澗泉谷草依舊揚清
風泉可掬草可擷清風洒面如冰雪閒來攜手四五人
倒盡金壺頻不熟寸心何獨忘寵榮形骸遺盡神超越
寄語世上士勸君早歸來霹靂轟車膽欲落忠憤雖死
何為哉此時竟不悟此心徒自知嵐光向晚紫翠滴杜
鵑更在深林啼試拂橫琴奏流水指下忽作商聲悲悲
來乎可奈何推琴罷酒為君歌

武溪深呈廣帥蔣修撰

滔滔武溪一何深源源不斷來從郴流到瀧頭聲百變
誰將玉笛傳餘音潺潺泠泠兮可以冰人心胡為其氣
兮能毒淫漢兵卷甲未得渡飛鳶跼跼墮且沉天乎此
水力可任蠻血安足腥吾鐔功名難成壯士恥馬革裹
尸亦徒爾伏波一去已千年古像蕭蕭篴竹裏風來尚
作笛韻悲宛轉悠揚逐船尾如今天子治文明柔遠懷
來不用兵武溪無淫亦無毒清與滄浪堪濯纓臨瀧更

憶昌黎氏始末緣何不相類能言佛骨本無靈可惜咨
嗟問瀧吏湘妃之碑尤近怪頗學女巫專自媚固當褒
馬聊黜韓補葺須令賢者備元戎喜遇蓬瀛仙武溪探
古傳新篇東君吁嘻龍蜃走北斗挹酌河漢懸勸君莫
倚隴笛之悲音些勸君清歌兮援玉琴些琴聲為出堯
舜心堯舜愛民無遠邇君不見薰風來自南些

松門阻風望廬山有懷李白

北風阻船泊湖濱北望廬阜青無痕晴雲自舒仍自卷

白龍欲眠猶宛轉秋空漠漠秋氣淺碧天蘸水如刀剪
篙師畏浪不敢行却憶李白騎長鯨倒回玉鞭擊鯨尾
錦袍濺雪洪濤裏霓光溢目精神閒終日高歌去復還
飛流直下三千尺風吹銀漢落人間天送醇醪傾北斗
羣仙吹簫龍鳳吼李白一飲還一醉醉來豈知生死累
倏然却返玉皇家不騎鯨魚駕鸞車留連自摘蟠桃花
嚼花吐津染朝霞不信如今三百載頑鯨駭浪空相待

苦寒行二首

江南饒暖衣絺綌今歲春寒人未識
溪流冰合地成折
一月三旬雪三尺去年大潦民無食
子母生離空歎息
只今道路多橫屍安忍催科更誅殛

下溪捕魚一丈冰上山採樵三尺雪
人人飢餓衣裳單
骨月相看眼流血乾坤失色雲未收
鵬鶚無聲翅將折
官倉斗米餘百金願見春回二三月

武夷行寄劉侍郎

平生愛山水最聞武夷好
千峯噴吼月倒掛萬木陰森

春不老羣仙浮舟出寥廓未濟明河半空泊世人可見
不可攀靜夜天風吹寶樂須信仙家日月長塵埃下土
空茫茫賢愚得失竟何益坐令綠髮催秋霜人間感悟
有誰早丈人尋真歸故鄉故鄉宅在武夷址山勢迴環
碧城起仙基一局一番春幾見桃花滿流水他年功成
趨帝闕醉喚嫦娥擁明月照開三十六洞天玉樹瑤花
恣攀折丈人之樂其無央我今欲往親在堂側身南望
未能到耿耿寸心思夢長

青山集卷二

謹案卷一第十三頁前二行安而不可動者為梁
為棟原本者訛老今改

第十五頁前二行慕袒跣兮臨流原本袒訛坦今
改


卷二第十頁後六行豈合鸞鳳反翔翔原本翔翔
訛翔翔依本韻改

第十四頁前五行清逸樓高二千尺原本尺訛赤
今改

第十五頁後三
來此幽棲聊脫械原本械訛縱

依本韻改

第十七頁前六行此時竟不悟原本悟訛悞今改
第十九頁前六行願見春回二三月原本見訛兒
今改



總校官進士臣胡榮

校對官編修臣裴謙

謄錄監生臣金士虔

欽定四庫全書薈要

集部

青山集卷三

四

詳校官助教臣常循



欽定四庫全書薈要卷一萬五千九十四

集部

青山集卷三

宋 郭祥正 撰

五言古詩

游仙一十九首

漠漠出寒霧悠悠趨太清
珠樓被重綃靈花紛素馨
青衣捧綠章磨丹書姓名
為我橫玉笛一奏雌龍聲

非塵復非煙氤氲散紫清
乃知冷風御脩脩恣游行
忽

逢黃金闕云是玉帝京逍遙侍御者不假精銳兵

扶桑并咸池窅窅殊在下真陽涵素光無晝亦無夜神
體當自保不與物俱化運齡從此長塵緣頓消謝

至道不由學顏齡安可住宿命無纖懼重玄乃遐悟鮮
明女蘿裙致我火漈布稽首存至誠欣會如所度

至音非樂音玲瓏聞自然殊絕洞房景亦超鬱羅天靈
嬪下鶴馭問我來何緣却驚與世隔一別三千年

澡心華池液薰手玉樓香一披寶神經衆真共來翔七

言詠良遇至音迭琅琅珍重衛夫人行草記瑤章

太微無烈風紫臺多靈露逍遙三五客披衣縱高步回首笑復歌游此今幾度却嗟寰中人枉為死所誤

仙家無四時瑤草常芬芳五嶽倏來爾玉鞭驅鳳凰得道迭相度不聞嫉賢良所以心無邪人人自年長

妙景素無雜玉界涵虛明妙聲清不淫洞歌奏金鈴真遇非遐想忘心乃全生噫哉百年內得失安足營

峩峩綠幘中飄飄清霞裙手持紫毛節身乘三素雲駕

言欲何適上朝玉宸君隱書謝所賜洞明道之根

脩然乘一氣來往游太空間歌內景章遂登蕊珠宮華
英不知名激齒甘液濃此樂無憂累固非侯與公

投真落人世條經四九年覩紛未嘗競內顧淨且淵果
逢飛行羽得披紫微仙攜手浮絳波絳波春渺然

攀泂日月窟遂觀天地樞搗金鑄豪英搏糟醞庸愚校
量宿所造報應無差銖丁寧與世言安分勿浪圖

在天不擇友天人皆正一雲漢共翔翔隱耀無固必豈

同濁世游自謂膠投漆毫端利害分白眼永相失

倏逢九華妃授我磨鏡石一磨日月朗萬古永不蝕緘
之紫錦囊匪同趙氏璧纔落猛士手睨柱曾莫惜

二景結良匹曾非塵慮侵欣欣啓皓齒玉珮揚清音碧
河并絳實採濯期追尋言舒意亦散雙好永齊心

神凝光自生洞房玄照映青絲散垂腰目采流玉鏡共
談上清事精微寄餘詠樂酣會既分雙駕還霄嶺

清僚真可慕振衣願所歸既絕世上緣吾寧抱愁悲雲

韶自相諧虛聽方達微是將跨靈羽逸麟復攀追
窺天見天根步玄入玄門素光流一氣默默復渾渾揮
手散餘景至心揖靈尊從今乃忘言大道多子孫

春日獨酌一十首

桃花不解飲向我如情親迎風更低昂狂殺對酒人桃
無十日花人無百歲身竟須醒復醉不負花上春
江草綠未齊林花飛已亂霽景殊可樂陰雲幸飄散且
致百斛酒醉倒落花畔

平生最嗜酒，况復就花飲。明月正照人，吳姬安得寢。更起盡餘杯，擊碎珊瑚枕。

芳華無十日，自勸頻舉盃。素髮易凋落，青春難再來。林間黃鳥轉，日下浮雲開。吳歌梁塵飛，越舞白雪回。英雄既長往，珠金安在哉。僅存一丘土，石麟卧蒿萊。誰曾將濁酒，為君傾夜臺。

醉去卧蘭茝，安用張蜀錦。何必黃金盃，瘿杓亦足飲。物理不可齊，好惡乃天稟。真精既洞達，空無仍諦審。所以

陶淵明北窓自歌枕起作無絃彈此音殊妙甚

雷聲散陽氣晴景醉長天綠從何處來染我山下泉
汲泉釀醇酒舉盃復頽然寄謝伯夷輩餓名安用傳

春日何遲遲萬物涵陽暉君看源上桃並蒂花滿枝
雙梁間燕營巢知所歸凌霄附長松託根亦有依餘生
如不飲無以謝芳菲

不羞雙鬢雪折花向林間念此光景速未能身世閒
滿酌金罍斗遙望謝公山跡欲扁舟渡心先高鳥還
今朝

不酩酊何以破愁顏

幾日待春光春光易衰歇流年信密移誰能保肌髮何
須秉蠟炬今夕值明月但願海變酒拍浮長出沒歸來
歸去來蓬山有仙闕

海棠微雨濕枝上殘紅泣山鳥啼向人春光一何急濁
酒注我腸免使新愁入却欲買扁舟漁竿荷蓑笠

田家四時

田家時雨足鞭牛務深耕選種隨土宜播擲糯與秔條

桑去蠹枝柔柔待春榮春事不可緩春鳥亦已鳴

麻麥聞熟刈蠶成繰莫遲更看田中禾莠莠時去之幸

此赤日長農事豈敢違願言一歲稔不受三冬飢

開塍放餘水經霜穀將實更犂原上疇坎麥亦云畢老

叟呼兒童敲林收橡栗乃知田家勤卒歲無閒日

田事今云休官輸亦已足刈禾既盈困採薪又盈屋牛

羊各蕃衍御冬多旨蓄何以介眉壽甕中酒新熟

朝登北山頭二首

朝登北山頭千里入平望本欲寄吾懷胡為返惆悵晴
雲隨白日西去沒青嶂素絲行滿頭吾年安可壯

朝登北山頭悠悠望江水水流無還期人老行已矣勸
君把一樽聊用置悲喜生無死何有原終乃知始

感春二首

高枝花自舞低枝花自笑上有濃露濯下有清溪照開
落十日間誰識春工妙一杯亦頽然獨醒時所誦

漾漾酒盃綠披披花萼笑雖無同心客幸有白日照趨

時性已拙悲歌聲不妙素髮未能歸猿鳥應相誚

同阮時中秀才食笋二首

蒼崖長龍孫頭角露已甚呼丁恣庖割移榻就濃蔭
恍疑羽林槍羅列在紫禁餘鞭橫瘦地密籜若紉紵
亭亭風勢勻節節泉脉沁藩垣謹藏護寧使暴客闖烹調
衆云美剪伐吾亦任繞齒嚼冰漸毛髮寒以漈閒心本猿
鳥世咏嗟毒鳩野逸誰所憐愁思腸胃滲詩才君獨勇
辨舌予久噤酒行且莫辭醉膽滄溟浸况逢堯舜治面

內來左袵熙熙冠蓋游落落飽食飲鸞鳳自橫飛燕雀
蒙廣廕徘徊食笋謠明發扁舟賃

予生本無羈縲為茲縣尹日長公事餘佳客車接軫入
林安所食烹庖就肥笋森森蒼龍孫頭角遭束窘金刀
僕爭割紫箨手親隕草火尤相宜狼藉亦殘忍聊為一
餉樂得酒輒滿引喧呼棋屢勝慘淡詩不敏予腹既便
便從君莞而哂

鵠奔亭

新江自南來西與端江匯屹然鵠奔亭遺意溢千載

化城寺清風亭

唐時升老亭剪棘今重開南瞻峨眉關北峙凌歊臺新
公將家子為僧亦多才譬彼獨鶴唳安用羣雞猜或彈
玉軫琴傾耳濯纖埃清風不知處凜冽時時來吹雲雲
窈窕吹月月徘徊幽人許共賞渴心咀珍梅了然得真
味塵魂自然摧令姪又豪俊書名駭奔雷禪談屢終夕
茗酌無餘盃還歌太白篇事往良可哀古今儻同轍浩

氣不成灰

懷友二首

夕陽在牕戶涼氣何處來微風泛庭柯蕭蕭厯空階抱
琴一寫之冰霜澣孤懷但惜對樽酌而無良友偕聊將
幽獨思滔滔寄長淮

晚坐庭樹下涼颼經我懷亦有樽中物佳人殊未來佳
人隔重城誰復為之儕瞻雲雲行天步月月滿階想聞
誦聲作崩騰瀉江淮

七月八日要閤公達承議晚酌二首

河橋散靈鵲曜景逾佳期池華延舒月尚可傾一卮欲
以要良賓秋事言淒其歲往豈再得綠髮含霜滋寓意
不在飲營駕君莫辭

營駕君莫辭寓意不在酒得酒亦可喜話情底延久鷺
白不翳塵山光含美璞霞綺映池葩蜩蟬嘶露渥時平
魚橫^平愁身退茲餘裕彈琴來薰風高軒良可佇

嚴氏西齋

立屋聚羣經執經授諸兒趨善務深畜言行蹈前規譬
欲種嘉禾春膏力鋤犁一朝秀而寔刈熟當如抵遂為
道德飽用濟斯民飢庭木豈不美涼陰奉邀嬉池水豈
不深濯熱臨清漪作止既可樂左右皆宜之瑤琴誰為
彈倚聲奏吾詩

招蔣頴叔游丁山彰教寺

閒心樂名山景象恣吟剽昭亭西南隅亂峯最青峭盤
盤得修徑豁豁漸明眺一讀道傍碑古興資雅要知有

金僊家即往不俟召平田轉回塘飛瓦接危嶠東邊卧
石虎徐王舊墳北但驚深蘚晦不見金碧耀圖形半殘
缺冷榻孤燈照深篁歸鳥沒空巖雪風叫勅書刊翠琰
靈迹護獵燒寒潭多蟄鱗佛子忌漁釣動活各遂性蕃
衍理可校餘輝初月散幽籟發玄竅中有無心人禪禪
自相紹問年逾耳順膚色尚如少翻令念達人鴻蒙首
頻掉時平冠珮繁往往屬不肖豈如棄以歸林泉自投
跳卓彼蔣夫子詩辭極精妙能來同我游險絕共長笑

終當為君誦古律變新調更評江南事僭迹又足悼不
能降真人卒用焚祖廟馴狐啼老木愁烟起荒藿復有
貳卿碑曾為叅軍弔勇為手勢吟一助玉瓶醕

同蔣穎叔殿院游昭亭山廣教寺

晴光散餘翳佳辰值清和聯車不辭遠共登昭亭阿步
夷愜蒼石緣險捫修蘿迥出白雲上俯瞰飛鳥過凌霄
挿危觀裂地注明河微風解蘭芷廣陂浴鳬鵝潭潭紫
華君左右森矛戈雷電在呼吸玉幣薦牲犧廟食溢千

載祐民理無訛崔碑夢協吉謝守詩載歌却憇林下寺
斐顏迹尤多丹青業已晦長髯但皤皤筆畫肖家法燕
尾無偏頗覽古發遐想緣情還獨哦逢時不榮達憔悴
同苦蓑嗒馬姑自喪安之如命何彼美蔣御史道術追
雄軻眄予委泥洹有意傾餘波薦士古來重拔茅今則
那書為昭亭篇昭亭崖可磨

同許棲默游華陽洞

春歸白晝永庭虛民事退尋幽何所之佳賓幸同載出

門十餘里仙者餘跡在虛實固難評洞壑茅可愛綠蘿
垂長簾秘景得藏晦造深揭葦火陟險汗漸平背中寬
稍可休仰視覆圓蓋石乳忘歲年物象千萬態龍泓泔
澄碧溢溜漸飛灑陰森毛骨寒志往力殊怠磨崖記名
姓斯游定難再人生足離合世沒異屯泰清風起林杪
蕭瑟動天籟歸與亦可求盈筐採蘭艾

同劉繼鄴秀才游嶽麓登法華堂呈如水長老
南出長沙城西渡瀟湘水誰鋪碧鮫綃迥透黃金底中

分橘植洲隱若鼇背起府邑古稱雄地勢信少比苟非
仁義圖疇將甲兵洗晚色煙霧開人家明鏡裏斯須捨
舟楫縱步踏蘭芷遙遙望松門物象愈奇偉枝葉既不
繁霜雪詎能毀傳云陶將軍屯營手植此至今凌雲氣
猶如大君子纔過清風峽路轉不容跬塵寰自此隔佛
界朗瞻跂層梯上重門繪塑光煒煒皓鶴去無蹤寒泉
但清泚遂登法華臺平目瞰千里還驚人世卑塹壁徒
為耳連甍十萬戶羅列在桮几想當韓杜時荆榛晦

遺址不見湘西篇惟誇道林美幸同劉子來縱視眼不
昧作詩君莫謙前輩尚可擬揮筆方爭豪求心翻自鄙
請看梁上題半是丘中鬼白髮纏利名何由外生死道
師深悟禪軟語聽疊疊明驅三乘車濟我岸超彼臺名
將謂何此喻有深理香色存天然了不染泥滓救物運
真悲得法終日喜

游雲蓋寺

名山寺多占此寺山尤名妙雲鎮彌覆層層結縵纓日

光晝微開燦射黃金城木老枝葉簡水長音韻清五峯
如紺蓮中有樓殿橫是必龍華宮禪禪悟無生一燈破
羣暗衆燈迭相明紛空素葩墜悲晚孤猿驚予方困遘
途寓宿骨已輕願言永棲此讀盡寶藏經願盼適所適
了絕物外營馬秣僕亦飯奈何催北征

游鹿苑寺

游遍湘西山晚至鹿苑寺平岡列城郭長松肖兵衛入
門尤清涼讀碑辨往事乃知阿育王曾此藏舍利浮屠

當殿陰令人竦瞻眎寶網敷金雲倏忽變蒼翠僧云秋
杪時月靜甘露墜大覺去無蹤山祇自靈異白鹿不我
逢殘花在巖際居者多壽老安禪信無累筇衲為生涯
心不墜情偽源源聽法語陶陶襲和氣簪紳胡為乎頂
踵縛憂愧願從彼上人預聞第一義煩心沃醞醑頓悟
超十地聊為鹿苑吟清夢不成寐

游華陽洞阻雨

此洞昔無聞人跡固稀到一昨紫微游刻石記所好遂

令天下知游者爭欲造我方珮縣印事閒慕高蹈聯鑣
二三子並堅松柏操樽壘薄攜持丁壯却前導行行逼
崖巔紫翠射襟帽方疑攀鬱蘿又若堆海潦石門未及
窺忽值山雨暴風雲暗衢路雷電折巖嶠蒼黃僕夫語
勇躍猿猱呌黃泥濡衣裳安得白日照初游成歡愉中
險觸憤懊佛舍距幾何望望目睛眊擊鎗促疲馬十步
九歌倒登堂亟就榻釋子數相勞尋幽尚齟齬處世信
難料暫時稍蘇息起坐復悲嘯寧非山鬼護不使俗客

眺桓桓翠琰文愈讀愈精妙名由今日新跡入萬古耀
騏驥步莫追駑駘志彌劬猶期六月來散髮避炎燎一
雨終阻絕何以爲壯少歸歎歌蕪詞聊爲起庸調

介甫先生

游茲洞始作記文
易花陽爲華陽焉

夏日游環碧亭

登山得斯亭佳賓幸過從取筍蒼玉林置酒黃金鍾願
言壽而康泰運寧易逢孔子陟三事堯舜乘六龍民財
皆辨析田壤仍登豐關關禽聲和剪剪木影濃濯足就

綠水披衣攬清風微吟百憂散達道千古同諸君況才
豪如羆復如熊莫辭爛醉歸皓月還生東

和穎叔丁山黯字

寒日少晶光山色亦慘慘瀑泉凍不飛啼鳥聲頓減傳
呼繡衣來僧鼓擊坎坎石坐無氈裯團團織蒲莢比為
泉石游固已慕清淡愛君神采瑩皎若白玉鑑一登林
際亭毫髮無遺瞰勇起發孤唱四坐噤莫闕君辭如太
羹我語効鹽鹹卷旗促降敵賢將釋不斬雖生已包羞

鉞刀竟誰鑿却讀道傍碑往事增新感功名能幾何回
首歲時暫胡為奪浩氣百憂煎一膽趨時既迤邐獨往
固勇敢白雲無人爭皓月從我攬開樽直一醉莫驚別
袖揜明發何所思龍斷坐汲黯

和梅謙叔丁山吃字

臘月衣未綿兩股凍成疾誰復為我扶平步時時蹶文
章那更論精魄恐墜失緣何御史君相招傍寒日迤邐
造林泉塵坌為披拂霓幡雲外垂石虎草間出深門窺

次寥拱木遞蕭瑟丹青與老碑遺事知髣髴舊迹已榛
蕪新游論膠漆主人才何如驥足千里逸梅君南昌後
襟韻猶淒凜劉子亦好奇彖象久精詰願予最空疎昔
辯今已吃謗言求戈矛自量幾不密終甘首陽餓豈效
操瓢乞

酬穎叔見寄

鏗鏘南華經語意妙復妙高能出蒼旻卑不厭藜藿陰
靜偶暫處隱迹兩莫弔息踵真人徒息喉愚者紹方同

造物言萬變領樞要既能無怛化勿鑿混沌竅百家拾
其餘所得乃遺溺至音聽以氣世或昧此調不見杏壇
講猶為漁父誚君看泰山頂半夜日先照惟逢蔣穎叔
沉默造玄突落筆逾萬言嚴密若誥詔嗟予久聾瘖此
道雅未剽一昨聞君談神悟百骸療人忘道術游魚忘
江海跳昭亭果見期為發長嘯

秋水閣席上呈穎叔原道

我愛秋水閣水影照采椽瑩碧不知極定與銀漢連荷

花十丈開白藕想如船雙鶴時一鳴寒霄下迴旋況復
對羽客豈異蓬萊仙便當沽玉液猛飲明月前人生不
嗜此何物能逃年請君傾醉耳松風奏薰絃身世能兩
忘安用養浩然夢覺事已殊此道誰能全馳驅冠劍徒
百歲猶倒懸深深下與地冥冥高出天君語達已達吾
歌玄復玄大笑問劉子細窮秋水源秋水源可到更寄
琳瑯篇

酬耿天隲見寄

追維平昔游十幾喪六七與君雖尚在蹠蹕各衰疾功
名無幾何歲月忽已失伴來辱新詩欲和久閣筆文章
老愈精光彩爛星日市門果神仙參軍真俊逸又如閱
沙漠鐵騎萬餘匹一戰孰與當百勝得深術有過懼不
聞遇惡志所嫉言歸潔其身天命能自詰知音我愈寡
深谷詎敢出

君作潔歸堂遂有退居
之計而勸予出就仕

相望止一江高議

容接膝請觀商山皓寧終守蓬蓽衆人拉其華君子俟
其實定當卜隣去携手藏于密

酬李公擇謝予贈范李猿獐

黃輦雄領雌青猿母抱子一落罝網中城市就生死不
如圖畫上山深石泉美永無罝網憂精神自全耳愛之
寫橫軸容易披桮几動靜適自感物我忘表裏猶疑跳
擲去毫端詎能止易生名獨擅斯人嗟往矣後來稱范
李贈君君勿鄙縱令筆未妙猶勝負塗豕

同陳公彥推官登峨嵋亭

新亭彼誰構名因翰林揭惟南極空曠朗詠佳興發傾

蓋忘形骸輒莫歎華髮歸忼天外低渡鳥雲端沒中原
崢嶸際天塹限楚越寧知承平來但見山花歇君相方
聖賢胡為念京闕但窮林泉樂躡屐上嶢岵酒量孰先
降樽壘未云竭欲尋太白墳草間迷斷碣神交無古今
清風來飄忽征轡還催人東峯挂寒月

青山集卷三

欽定四庫全書薈要卷一萬五千九十五

集部

青山集卷四

宋 郭祥正 撰

五言古詩

穎叔見招赴何秀才家飲

鞭驢赴君招十步九蹶促相逢即忘勞
深圍坐重褥恍疑出塵寰氣象豁雙目
名花散天香仙露浥柔玉寄樂方寸間
豈必待華屋脫屣遠市朝散髮免羈束
更聞誦

新作字字芝蘭馥堆盤櫻實紅滿竿撥醅綠幽歡未言
歸酒令不須督平時常卷舌動靜畏險俗玄談今盡傾
我難慳君欲朝聞夕可死悟矣無遲速感君傾醍醐洒
我久飢腹又如旱田禾沛然甘雨沃主人意慇懃呼兒
具燈燭誰家有斯客貫衣心亦足明朝得長篇調險不
可續

和公擇觀李煜書法喜禪師碑

五代迭凋喪江南最偷安三世弄翰墨煜札尤可觀禪

林榜法喜妙勢如飛鸞塵埃一藏晦
斂斲脫羽翰幸逢集仙守好古將模刊
振襟自披拂塗飾粉與丹呼僧辨遺像
髣髴存纖紈作闕究本末風雨生毫端
精神還故物霹靂驚蟄蟠幽光亦煥發
令我復長歎念彼士君子窮年抱飢寒
不及奇古蹤泯默知遇難

和樊希韓解元

君馬一足病瑣瑣阻行邁况復梅雨天
坐卧不能快空山無大壺何以具君嘅
墻根採肥杞湖濱買鮮魴開樽

薦濁酒高論幸忘憊寸心拔茅塞兩耳抉雙瞶文醇潛
太和詩險露幽怪聯吟極物象君勝我屢敗東野久龍
鍾多慙退之拜竒才必自重雖黜愈勿懈卞璧未遇時
在璞豈能壞鑒賞一日逢青紫信如芥君行且遲留馬
病願未差貫衣亦何辭庶用接嘉話

和公擇游壽聖院啜茶題名

使君尚清淨携客無盃肴茗酌拂佛經塵緣頓沉拋踈
雲墮簷際微風汎林梢吾心已皎皎吾學豈詭譎毫

題名姓識此逍遙交

和法宗上人月下懷故人

山沉江海濶月行天中央
游子宿何許只應歸夢長
浮雲且莫生星河助餘光
徘徊問孤影惆悵安可忘

酬耿天隲見寄

我思昔人言處世猶大夢
塵編堆牀頭撫事聊一誦
興衰繫時運賈誼爾何慟
又思東方朔為鼠知不用
誰憐勝下兒能領百萬衆
勢去競詆排功成乃歌頌
人情豈

相遙此理古今共桓桓耿夫子策射金榜中老彼澗底
松未作明堂棟暫來令句曲尋仙造深洞摩挲瑤琪花
借問誰所種開落既忘年一奏薰風弄詩言此歸隱不
戀五斗俸何時定掛冠我願為僕從

和韓求仁推官

終日汨城市閒心眷犁鋤故登原上亭解此塵中裾芬
香採薇蕨馴狎憐麋狙却願物理變四角生我車

樊山

即孫權郊壇祀天之處壇今尚
存而謝朓詩云樊山開廣宴也

漢室火符熄羣雄起縱橫兩京蕩為墟萬里無農耕曹
操劫神器欲竊禪讓名吳蜀恥北面鼎峙方戰爭殺人
如鱗魚天地厭血腥至今武昌邑尚傳吳主城長江吞
八極圓壇窺杳冥想當裡郊時志勇掃櫓槍燔柴封王
牒冠弁羅公卿登山錫燕喜日光爛旗旌寧知後嗣弱
壯業竟無成空餘舊基址千載未欹傾常時屢掩卷每
讀涕泗盈而况泊舟檝披榛自經行霸圖何所見芳草
與雲平晚浪淙石脚猶疑兵甲聲

觀怡亭序銘

有唐三百年絕出陽氷篆最憐怡亭序筆畫兼衆善磨
崖深雲間人跡到應鮮亦如大君子隱晦久而顯裂素
印麝煤字字未訛舛冰凍垂瓦石犀尖利刀割連環不
可解虬尾勇自卷誰云模以刻曾是玉工碾銘辭志尤
宏雲翼待風展琳瑯諧八音雅重叅二典英豪逢一時
江山供廣宴遺蹤逐飛鳥舊址沒榛蘚良朋信稀遇古
興浩難遣吾宋垂百年教化固非淺人人擅文翰比唐

殊媚軟作詩聊自警中道尚可勉

殊亭

元次山為武昌令馬尚才殊行殊政殊亭因而名之吳子恭云元碑近為俗令碎之

矣

昔人才行殊亭名至今在何年復基構勢壓鯨鰲背
中間鄙俗令元碑遭睚眦豺狼爾何營龜螭手親碎甚哉
憎疾心曾不校異代我將掇其餘補刻尚可再仰瞻天
宇寬俯視江流大危危一葉舟故欲萬里邁差池想遺
風雲山有殊態

怡亭

斐虬作銘李莒八
分陽冰篆序存焉

英才欣會遇曠懷各無瑕
二李妙分篆斐銘語尤嘉
盤虬奮鱗灼灼月吐華
天影望不盡雁行飛屢斜
晴雲依晚岫芳草接平沙
東溟與西塞吾寧辨渚涯

石門

唐令尹馬向嘗與次山醉
于石門之下石刻存焉

雙崖屹然起剔蘚認題識
乃知賢令尹曾同漫叟醉
落景正西盡長川自東逝
唯此兩石門不開亦不開

郎官湖

即李白以張謂
愛湖而名之

張公昔愛湖湖名自公始寥寥三百年逢秋愈清此移
船菱荇香游魚數潁尾回望武昌郭樓臺碧天裏石照
瀉靈光湖波皓如洗此景絕世無愛之心無已緬懷昔
賢期林表清風起終當歸結網來此養衰鄙

峯頂

登山不辭險探景須窮幽行徹五千仞回首視九州人
寰莽何處大野蒼煙浮更酌天池泉古意空悠悠

醉石

裂障飛寒澗絕壁散明珠盤石偃中塢修林陰翳敷世
事紛莫救逸人此提壺一酌寄乾坤回首忘車書山花
謾相笑山鳥徒相呼更逢山月來夜響真笙竽粹靈陶
耳目幽獨寧賢愚留蹤千載間游子空踟躕清風起木
末餘涼生坐隅浩歌歸去來逸韻凌遙虛

洞庭阻風

用韓退
之韻

南風吹炎蒸歲望固已休怒濤掀洞庭信宿留歸舟沙
場萬馬放大壑羣龍投陰靈孰爾職曾無與天謀崩山

作深潭深潭變高丘上天有號令豈汝可自由朝蠅徒
咂咂暮蚊况啾啾歸興邈以阻觸緒增新愁安得跨白
鹿山行肆悠悠誰能守荒浦泛險終何求

濡須山頭亭子

孤亭壓危峯絕景入平眺雙崖控巢木禹力萬古耀林
傾乾象闢濤淙地軸掉茅茨數椽屋噫哉魏武廟心殊
岐山伯跡異甘棠召荒戍傳遺靈血食豈無誚吞吳勢
雖壯晉起國旋剝樓船戰士去滄浪盡魚釣平時欲何

為覽古謾長笑愁煙起孤壑白鳥聚殘照誰令五月來
不見萬山燒又復想大雪下上玉巖嶠重游莫能期將
歸且停楚詩辭搜亦苦物狀竟難肖終篇寫亭壁翻慙
畫師妙

謁桐鄉張府君廟

桐鄉富山水此地最深秀諸峯合屏圍二岡屹龍鬬谷
暖禽語滑岸束溪聲走老木如巨人森衛備前後神功
金刻存廟古何年搆衣冠近唐人名字嗟莫究憫旱鞭

怒蛟深潭此身仆明誠動蒼天雷雨洗白晝至今福斯
民血食固宜厚予生本屯賤竊位憂致寇約身既多缺
何以撫耆舊况瞻賢達迹彼美松柏茂芳醪薦樽爵馨
蔬實籩豆悠悠神之思餘光破昏憒歸歟歌蕪辭聊用
答靈祐

大風

一鳥忽驚鳴衆鳥高下噪飄風自南至汹汹結陰瀑須
臾江濤翻石裂巨木倒禾麻安更論畦隴潏若掃蒼天

本好仁孰使風伯疏有叟重咨嗟吾年行已老此風未
嘗見神理所誠告我因諭彼農天地廣覆燾噫氣亦偶
然何必泥應報掉頭不我顧植杖復悲悼

蘭陵請雨

夜半何所適請雨之名山蘭陵古仙府妙迹殊可攀秘
文呼蟄龍舒雁薦層壇屏氣注誠想百靈啓玄關綠章
封事奏金闕承恩還林風生泠泠澗溜添潺潺遙峯靄
冥霧條歛迷區寰殷雷無猛威激雨增微瀾寧獨濡枯

焦永願消塵煩

觀雨

不雨九十日火氣流郊郭空山渴虎兕涸泥困龍魚農
事固騷屑令人但長吁渺思真宰意反覆竟何如去歲
百川溢田園變江湖南民遂乏食十九棄路衢那聞今
秋旱性命當無餘祀龍稽往法擊鼓煩羣巫殷殷百里
雷奮自東南隅陰雲隨電合密雨應時須驅馳蒼黃際
慘淡氣色蘇登樓注遠目百憂聊滌除銀浪徹平地玉

繩迷太虛日月洗塵坱山川改焦枯法宮朝大舜冠珮
皆鴻儒况當禮樂新百靈共持扶和氣自茲肇風雨安
敢逾欲傳千歲音詠言愧蘼蕪

春日懷桐鄉舊游

二年桐鄉邑乘春覽榮芳日日遶花樹與客傾壺觴况
有清澗泉潺潺穿北牆容為方廣池白虹卧危梁誰磨
青銅鏡朗照紅粉粧唯恐浮雲來遮我逍遙場舞娥回
皓雪笛叟鳴鳳凰醉則卧花下所惜徂春陽作詩數十

篇素壁揮琳瑯詔書徙幕府籠鳥無高翔却治歷川獄
幽憂坐空堂有女殺其母逆氣凌穹蒼郡縣失實辭吏
侮爭持贓辟刑固無赦何以來嘉祥高垣密閤禁但覺
白日長茫然思舊游今成參與商世網未能脫樂事安
可常咄嗟勿重陳昏昏燈燭光

東望

歷陽望姑孰撫掌衣帶隔却瞻天門山落日一雙碧不
如雲中鳥自在鼓兩翼冠裳漫羈紲髮綠今已白功名

隨浮煙所得乃祿食天兵下安南獠穴須滅跡騰山吼
貌虎跨海轟霹靂殺氣暗南溟萬古一洗滌借令伏波
在縮手定歎息男兒逢此時弗往荷矛戟胡為守文法
銖銖較朝夕終當解官去大艦挂長席乘風卷雲濤載
月奏玉笛不作凌烟人猶為釣鰲客誰能對鄉關跼步
歸未得

把鏡

念念遞遷謝新故來未停把鏡覽素髮不覺今年生生

世能幾何焰長燭愈短勸君杯中物到手莫辭滿陽春
纔爛熳花片已飛舞紛如晴後雪半作燕巢土堯舜竟
何在楚漢空戰爭勝負一日事寂寥千載名隱几聊自
悲悲竟復長嘯真體元空無誰與我同調

望白紵山

隔江望白紵葱蒼壓牛渚却憶跨黃犢渡橋溪東去悠
悠登此山直待圓蟾午汗漫丹湖水萬頃浸天宇北斗
酌不乾光炯反吞吐諸峯若按几白雲俯可取覽景壯

我懷長謠念前古傳聞桓將軍置酒領歌舞雄風迴秋
霜英聲散鼉鼓寧知千載後荒榛老狐鼠男兒及時樂
一餉亦足許前年翰林公張唐公也絕頂構堂廡我方客沅
湘盛事未能覩及今佐肥幕治獄歷陽府注目聊獨吟
何時達庭戶

合肥何公檜部使者楊公潛古命予賦之

合肥有老檜得名自何公何公何代人名迹了莫窮高
枝偃羽蓋低枝卧蒼龍盤根徹厚地踈影落寒空荏苒

九天碧仍為煙霧濛相傳魏武帝解甲休鐵驄嘗坐此
檜下吞吳未成功至今晦暝夕往往揚英風我公心好
古清標聳千峯鑒賞揮巨筆丹青孰為工璨璨發明玉
瑩瑩叩絲桐談笑走兵役垣墻密泥封拂拭枯折幹一
助春風融願回扳山力移植明光宮

懷平雲閣兼簡明惠大師仙公

跨空起高閣北望敬亭山白雲無根蒂舒卷隨風還或
墮溪水上却縈松石間就之既明滅了然不可攀謝公

賽雨詩千秋瀉潺潺李白弄月處寒光湛清灣神交自
冥合髣髴眉睫間使我戀此境每來終日閒如何一揮
手失勢落塵寰功業復未就但驚鬚鬢斑滄浪不得濯
執熱長汗顏緬懷大道師焚香坐玄關悲心度羣苦振
錫鳴金鑲行當稟慈誨惠照開昏頑

和耿天隲見寄二首

熠熠陽氣動春事不可禦君家富林園宴賞樂賓主况
當解官歸精魄闕六腑或乘青板船縱纜東溪潄溪光

如碧玉皓月無人取信哉浴乎沂點也丘所與又聞全
於天卓越莊周語我方治幽獄歸期日日數讀君新詩
章對面若吳楚

猛風卷長江驚湍勢莫禦虬龍玄噴薄陰怪豈無主扁
舟未能往何以慰心腑想君東城居林花爛溪澣濁醪
初撥醅豚鱗又新取論詩予素降泛愛君獨與一聞韶
濩奏卷舌欲無語却瞻項籍祠繪畫安足數悵然歌虞
兮炎漢已得楚

對酒愛月示客

誰云月無邪那知月有情我住月亦住君行月亦行致
此一壺酒都忘千歲名胸中各有月莫遣暗雲生

望牛渚有感三首

身滯歷陽浦心傾牛渚雲聖人開六合於此渡三軍霸
氣掃無跡神功千載聞明朝有歸興石上洗塵紛
遙憐牛渚磯柳帶拖春綠歸思無時闌斷絃聲自續更
聽漁父吟悠揚寫心曲何人效斯人烟波洗雙足

江迥偏留月山空不住雲遙憐李太白曾憶謝將軍帆
影隨潮上樵聲隔岸聞柳花迷客眼三月雪紛紛

轂轂

轂轂復轂轂怪禽安用啼杏花已爛熳月色正相宜提
壺取新酒酌我金屈卮行恐風雨來亂紅辭舊枝尚恨
碧城鎖阻邀白雪姬耳邊無清歌素飲方自怡爾何騁
鳴聲彈射不肖飛初時厭爾聒既久不復疑但能怖愚
俗又足驚童兒天翁造爾軀無乃私自欺爪吻異鵬鶚

安能司禍機又不似羣鳥凶報吉亦隨白日竄深棘夜
鳴殊不移勸爾勿轂轂鳳凰忽來儀

登歷陽城望凌歊臺

平昔登凌歊西望歷陽岸江空蘆葦濶日落煙霧散
倏然別鄉國三載客淮甸賞心不復有離緒但紛亂
邇來治冤獄文字堆几案置之步城堞山川却對面
崔嵬浮圖出巨筆挿天半秀色凌丹青長毫蘸河漢
翻思宋武帝此地嘗壯觀美人厭煩暑揮衣待霜霰
流芳千歲間

陵谷未云變碑陰杜牧題缺玉稍可辨歸魂招不得舊
土常情戀時作梁甫吟清風忽吹斷

懷當塗石城寺

城東二十里寺有古石城過盡綠桑野還依流水行水
窮山亦合老木一區平蘚留虎豹跡巖多猿狖鳴樓殿
橫澗陰像塑鈿黃剝庭中有高花碧葉抱丹渥不知何
歲年春容鎮柔濯山僧亦龐眉發語頗真樸却讀羅泰
碑始知征戰場赤谷納箭血夜鬼嗥冷創雲霧第黯黯

英雄今則亡誰建大法宇救援弘津梁每來即忘還覽
古恣吟眺泐崖采菖蒲興發輒長嘯偶隨辟書起末路
遂難料十年未能歸應為山僧誚

昨游寄徐子美學正

念昔未弱冠與君昆弟游各懷經綸業壯氣凌陽秋知
音得袁宰鑒賞稱琳瑯君家天地崩泣血城南陬釋服
就鄉舉名姓必見收數為禮部黜考命寧怨尤子山僅
五十感疾遽不瘳子美如孤鴻哀鳴大江頭其聲最酸

楚聞者皆涕流有才多困蒙此理不可求我初佐星子
老守如素仇避之拂衣去寓跡昭亭幽篇章自此富寫
詠窮歡憂慈母待祿養復尉湓浦州隨辟宰環峯碌碌
三載周纔歸遭酷罰五體戕戈矛旦夕期殞滅餘生安
敢偷粗能襄事畢寒餓妻兒羞復入湖外幕萬里浮扁
舟幾葬江魚腹迤邐百端愁到官未三月閒疆預叅謀
招降五萬戶給田使鋤耰論功輒第一謗語達冕旒得
邑敢自訴斷木當沉溝兒女相繼死泣多昏兩眸脫去

殊未能將鱗已吞鉤春風吹瘦頰黃塵蒙敝裘纔趨合
肥府又鞫歷陽囚荒庭忘歲月忽見花枝柔清明動鄉
思一水嗟淹留却憶藏雲會雕盤薦珍羞高吟凌李杜
猛飲哈阮劉野寺想如昨游人今白頭倏忽三十年老
大功名休日轍不暫止吾生信如漚有酒尚可醉餘事
皆悠悠

送宋前之赴調

東岡送終畢北堂待榮養短筇跨羸馬西風吹祖帳玉

盤堆鱠縷金船，倒新釀。勸君當勇去，回首勿悽愴。胃中
五千卷，立功須少壯。揚名永不滅，孝節乃可尚。長安集
紛華出處慎，所向肯為聲色惑。一婢百金償，不知粉黛
蠹血氣。速凋喪，胡為發斯言。期子以將相。

浪士歌

并序

郭子棄官合肥，歸隱姑孰。一吟一酌，婆娑溪上。自號曰
醉吟先生。居五年，或者謂其未老可任以事，薦于上。上
即召之，復序于朝。俾監閩汀郡，尋擢守漳南。上復召之。

行至半道閩使者狀其罪以聞遂下吏留于漳幾三年
郭子一吟一酌逍遙乎一室之中未嘗有憂色又自號
曰漳南浪士客或疑而問焉郭子曰士有可以憂有不
足以憂者仰愧于天俯愧于人內愧于心此可以憂矣
反是夫何憂之有作浪士歌以釋客問

江上浪如屋海中浪如山浪士乘浪舟兀兀在浪間浪
頭幾時息士心殊自閑死生生死爾浪歌聊破顏

戴氏鹿峯亭二首呈同游

開亭面鹿峯白鹿每經過忽銜落花去還來卧青莎仙
者不可見孤峯但嵯峨踈篁映秀木好鳥鳴相和飛泉
洒天窓六月涼氣多賓朋四五輩飲酒朱顏酡璚琳粲
明質芝朮芬長哦皆為廊廟器偶會林泉阿蟠溪與桐
廬回旋竟如何却笑晉右軍弄筆憐白鵝


未能騎黃鶴高飛出塵寰且來跨白鹿隱見蒼崖間誰
為鹿峯亭名聞戴氏園仙者去已遠卷簾對青山秀木
染深塢鳴泉掛危欄春風吹綠鬢皓月頽朱顏賓朋合

簪履昆季芬芝蘭黃鶴安足騎白鹿不須跨但願有濁
酒長嘯此峯下醉醒醒復醉黃金任高價

青山集卷四

謹案卷三第九頁前一行言行蹈前規原本蹈訛

韜今改



總校官進士臣胡 崇

校對官編修臣裴 謙

謄錄監生臣金士虔